

## IV.

## WOLFGANGVS SEBERVS.

**M.** WOLFGANGVS SEBERVS, Theologus & Philologus celeberrimus, Suhlae A. 1573. d. 4. Aug. hanc aspexit lucem, & cum sesquiannum nondum attigisset, patre orbatus est, Auriga, qui victus quaerendi causa peregre abierat, obiitque peregre, hoc est, sic, vt nihil certi vnquam de ipso vel scire licuerit, vel audire. Mater, foemina egentissima, puerum in Scholam Suhlanam ablegabat quidem, sed, quod non suppeteret, vnde ali posset filius, ipse panem propter Deum expoposcit, & per octennium, ostiatim canendo, victum acquisiuit sibi, mensaque liberali Casparis Brey exceptus, & e Fisci Ecclesiastici pecunia soluto didactro, librisque necessariis comparatis, sub Praeceptoribus Suhlanis egregios fecit profectus. Anno 1592. Schleusingam in Gymnasium deductus est, nactusque locum sextum in Classe prima; A. 1595. d. 29. Mart. Schleusinga discessit in Academiam Lipsiensem: Lipsia, Magistri honore ornatus, in Hennebergiam reuocabatur, Annoque 1599. d. 31. Mai. ad obeundum Conrectoris munus introducebatur: Petrus vero Linckius, tunc temporis Rector, graui & diuturno cum vrgeretur morbo, Rectoris vices per solennem Introductionem, d. 24. Iul. A. 1600. peractam, Seberus iussus est subire, & a discessu Linckii, A. sequente 1601., solus titulum habuit Rectoris munusque. A. Rectoris hac sparta, quam resignabat d. 23. Aug. A. 1610., VVasungam abiit, vt ibi Decanus